



## KUVENDI I SHQIPËRISË

Tiranë, më \_\_. \_\_. 2024

Dokument parlamentar

### PROJEKT - REZOLUTË

#### PËR VLERËSIMIN E VEPRIMTARISË SË KOMISIONIT QENDROR TË ZGJEDHJEVE PËR VITIN 2023

##### Kuvendi i Shqipërisë,

Duke njohur përgjegjësinë e Komisionit Qendror të Zgjedhjeve për organizimin dhe administrimin e zgjedhjeve dhe referendumeve, mbikëqyrjen e veprimtarive të administratës zgjedhore, monitorimin e veprimtarisë së subjekteve zgjedhore, institucioneve shtetërore dhe të medias në raport me zgjedhjet, si dhe zgjidhjen në rrugë administrative të kërkesave ose ankesave që kanë lidhje me procesin zgjedhor;

##### Vlerëson veprimtarinë e KQZ-së gjatë vitit 2023 lidhur me:

Angazhimin e KQZ gjatë gjithë procesit, para, gjatë dhe pas zgjedhor për: zgjedhjet vendore të datës 14 maj 2024; zgjedhjet e përsëritura në Rrogozhinë datë 23 korrik 2023; zgjedhjet e pjesshme për kryetarin e Bashkisë Kukës në datë 24 shtator 2023.

Publikimin në faqen web të KQZ: raporte (të monitorimit të fushatës zgjedhore, raportet financiare të partive politike si dhe raportet e auditimit) për periudhën Janar-Dhjetor 2023; Vendime të Komisionit të Ankesave dhe Sanksioneve; Vendime të Komisionit Rregullator; Udhëzime të Komisionerit Shtetëror; Urdhra të Komisionerit Shtetëror; Vendime të KSHZ; urdhra/vendime të Nënkomisionerit; raporte (të Komisionit Qendror të Zgjedhjeve dhe raportet për KQZ-në.)

Zhvillimin e Konferencës “Votimi nga jashtë vendit-rruga përpara!”, në bashkëpunim me Prezencën e OSBE në Shqipëri, në kuadër të nxitjes së palëve dhe rritjes së ndërgjegjësimit për mundësimin e votës nga jashtë vendit.

Angazhimin lidhur me shqyrtimin e rezultateve të Prokurorisë së Përgjithshme për vitin 2023, mbi procesin e dekriminalizimit, për kandidatët për deputet në Kuvendin e Shqipërisë (2021-2025), për anëtarë në këshillin bashkiak (2023-2027).

Verifikimin e thelluar për kandidatët (për zgjedhjet e datës 14 maj 2023)

Angazhimin e KQZ lidhur me zëvendësimin e vakancave të njoftuara nga Kuvendi i Shqipërisë për shkak të ndërprerjes së mandatit të deputetëve.

Angazhimin në vendimmarrje për plotësimin e vakancave në ushtrimin e funksionit në këshill bashkiak gjatë vitit 2023 dhe 2024.

Realizimin e fondeve buxhetore në masën 92% për shpenzimet korrente, realizimi në masën 87% për shpenzime kapitale me financim të brendshëm dhe realizimin në total të buxhetit në masën 92% të planit të parashikuar për vitin 2023.

Realizimin implementimit të projektit në bashkëpunim me Qeverinë Britanike, mbi rritjen e informimit dhe ndërgjegjësimin të Komunitetit Rom për zgjedhjet vendore të datës 14 maj 2023.

Nënshkrimin e marrëveshjes me qeverinë zvicerane mbi projektin i cili synon rritjen e transparencës dhe efektivitetin e KQZ-së nëpërmjet mjeteve digjitale.

Bashkëpunimin e KQZ me Këshillin e Evropës për krijimin e Platformës Elektronike të Raportimit Financiar i cili synon përmirësimin dhe rritjen e aksesit në informacion, transparencë dhe rritjen e cilësisë së të dhënave dhe përpunimit të tyre nga përdoruesit e platformës.

Nisjen e dialogut për bashkëpunimin ndërinstytucional, me trupat zgjedhore në rajon dhe agjencive të ndryshme në nivel rajonal mbi zgjerimin e përdorimit të instrumenteve digjitale në zgjedhje, me mbështetjen e International IDEA dhe Qendrës për Sundimin e Ligjit të Finlandës.

Pjesëmarrjen e KQZ gjatë vitit 2023, me ftesë dhe mbështetje financiare të institucioneve homologe, në vëzhgimin e proceseve zgjedhore lokale, parlamentare dhe presidenciale në vendet e rajonit: Estoni, Gjeorgji, Armeni dhe Moldavi.

Pjesëmarrjen në aktivitete ndërkombëtare në Poloni, Strasburg, Bosnje-Hercegovinë, Kore e Jugut, Finlandë dhe Gjeorgji.

### **Kuvendi rekomandon që KQZ-ja për vitin 2024 të përmirësojë punën në këto drejtime:**

1. Ti kushtojë një vëmendje të veçantë dhe konkrete bashkëpunimit me institucionet përkatëse, përfshirë këtu edhe Kuvendin e Shqipërisë, në vijim të përpjekjeve të ndërmarra gjatë vitit 2022, për miratimin e akteve nënligjore në zbatim të Kodit Zgjedhor për të mundësuar votimin e shtetasve shqiptarë, të cilët banojnë jashtë vendit.
2. Komisioni i Ankimimeve dhe Sanksioneve si edhe Komisioneri Shtetëror i Zgjedhjeve, duhet të sigurojnë një vendimmarrje të drejtë, duke shmangur arsyetimet ligjore të paqëndrueshme, duke ulur kështu në vijim numrin e padive të cilat kundërshtojnë vendimmarrjet e tyre.
3. KQZ duhet të marrë masa dhe të trajtojë me prioritet çështjen e mosshqyrtimit të plotë nga audituesit e punësuar, të të gjitha raporteve vjetore financiare të partive politike, për shkak të adresave të pasakta; Gjithashtu, duhet të parashikojë, fluksin real të raporteve që do të shqyrtohen nga audituesit e licencuar, në mënyrë që të mos punësohen më tepër auditues se sa është e nevojshme, për të evituar kështu dëmin financiar që i shkaktohet fondit të buxhetit të shtetit për financimin e partive politike; KQZ duhet të trajtojë me kujdes procesin e përzgjedhjes së

audituesve, duke pasur në fokus qëllimin kryesor që ky proces ka: gjetjet, evidentimin e problematikave dhe marrjen e masave në përputhje me përcaktimet ligjore.

4. KQZ duhet të angazhohet më tepër në kuadër të fushatave të ndërgjegjësimit mbi procesin e votimit, në veçanti për votuesit për herë të parë, në mënyrë që të ketë një pjesëmarrje më të lartë të kësaj fashe votuesish.
5. KQZ duhet të marrë masa në lidhje me garantimin e qëndrueshmërinë së administratës zgjedhore, duke rishikuar sistemin e emërimit të anëtarëve dhe sekretarëve të nivelit të ulët.
6. KQZ duhet të angazhohet më tepër në mundësimin e përdorimit të teknologjisë në mënyrë që zgjedhësit të votojnë në mënyrë të pavarur dhe në fshehtësi të plotë.
7. KQZ duhet të angazhohet më tepër lidhur me informimin e zgjedhësve në mënyrë të vazhdueshme për format dhe mënyrat se si ata mund të denoncojnë shkeljet, si edhe se si ata mund të mbrohen ndaj pasojave; gjithashtu në afishimin vazhdimisht të listave të zgjedhësve në të gjitha bashkitë.
8. KQZ duhet të garantojë nëpërmjet administratës zgjedhore, aksesueshmërinë në qendrat e votimit nga personat me aftësi të kufizuara, në mënyrë që ata të kenë akses të pavarur në procesin zgjedhor.